

জাতীয় সংগীত

—

রবীন্দ্রনাথ ঠাকুর

জাতীয় সংগীত — সূচী (১৬ গান)

#1 ভারত রে, তোর কলঙ্কিত	1
#2 অয়ি বিষ্ণাদিনী বীণা	1
#3 শোনো শোনো আমাদের ব্যথা	2
#4 একি অন্ধকার এ	3
#5 ঢাকো রে মুখ	4
#6 দেশে দেশে ভ্রমি তব	5
#7 এক সূত্রে বাঁধিয়াছি	6
#8 তোমারি তরে, মা	7
#9 তবু পারি নে সাঁপিতে	8
#10 কেন চেয়ে আছ গো মা	9
#11 একবার তোরা মা বলিয়া ডাক	10
#12 কে এসে যায় ফিরে	11
#13 হে ভারত, আজি তোমারি	12
#14 নব ব সরে করিলাম পণ	14
#15 ওরে ভাই, মিথ্যা ভেবো না	15
#16 আজ সবাই জুটে আসুক	16

#1 ভারত রে, তোর কলঙ্কিত

ভারত রে, তোর কলঙ্কিত পরমাণুরাশি

যত দিন সিন্ধু না ফেলিবে গ্রাসি তত দিন তুই কাঁদ রে।

এই হিমগিরি স্পর্শিয়া আকাশ প্রাচীন হিন্দুর কীর্তি-ইতিহাস

যত দিন তোর শিয়রে দাঁড়ায়ে আশ্রুজলে তোর বক্ষ ভাসাইবে

তত দিন তুই কাঁদ রে॥

যেদিন তোমার গিয়াছে চলিয়া সে দিন তো আর আসিবে না।

যে রবি পশ্চিমে পড়েছে চলিয়া সে আর পুরবে উঠিবে না।

এমনি সকল নীচ হীনপ্রাণ জনমেছে তোর কলঙ্কী সন্তান

একটি বিন্দু অশ্রুও কেহ তোমার তরে দেয় না ঢালি।

যে দিন তোমার তরে শোণিত ঢালিত সে দিন যখন গিয়াছে
চলি

তখন, ভারত, কাঁদ রে॥

তবে কেন বিধি এত অলঙ্কারে রেখেছ সাজায়ে ভারতকায়।

ভারতের বনে পাখি গায় গান, স্বর্ণমেঘ-মাখা ভারতবিমান—

হেথাকার লতা ফুলে ফুলে ভরা, স্বর্ণশস্যময়ী হেথাকার ধরা—

প্রফুল্ল তটিনী বহিয়ে যায়।

কেন লজ্জাহীনা অলঙ্কার পরি রোগশুষ্কমুখে হাসিরাশি ভরি
রূপের গরব করিস হয়।

যে দিন গিয়াছে সে তো ফিরিবে না,

তবে, রে ভারত, কাঁদ রে॥

ভারত, তোর এ কলঙ্ক দেখিয়া শরমে মলিন মুখ লুকাইয়া
আমরা যে কবি বিজনে কাঁদিব, বিজনে বিষাদে বীণা ঝঙ্কারিব,
তাতেও যখন স্বাধীনতা নাই
তখন, ভারত, কাঁদ রে॥

প্র: ১৮৭৮ (1878)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

12,16 লাইনে অলঙ্কার ⇒ অলংকার

21 লাইনে ঝঙ্কারিব ⇒ ঝংকারিব

#2 অয়ি বিষাদিনী বীণা

অয়ি বিষাদিনী বীণা, আয় সখী, গা লো সেই-সব পুরানো গান

—

বহুদিনকার লুকানো স্বপনে ভরিয়া দে-না লো আঁধার প্রাণ॥

হা রে হতবিধি, মনে পড়ে তোর সেই একদিন ছিল

আমি আর্থলক্ষ্মী এই হিমালয়ে এই বিনোদিনী বীণা করে লয়ে

যে গান গেয়েছি সে গান শুনিয়া জগত চমকি উঠিয়াছিল॥

আমি অর্জুনেরে আমি যুধিষ্ঠিরে করিয়াছি স্তনদান।

এই কোলে বসি বাল্মীকি করেছে পুণ্য রামায়ন গান।

আজ অভাগিনী আজ অনাথিনী—

ভয়ে ভয়ে ভয়ে লুকায়ে লুকায়ে নীরবে নীরবে কাঁদি,

পাছে জননীর রোদন শুনিয়া একটি সন্তান উঠে রে জাগিয়া!

কাঁদিতেও কেহ দেয় না বিধি॥

হায় রে বিধাতা, জানে না তাহারা সে দিন গিয়াছে চলি

যে দিন মুছিতে বিন্দু-অশ্রুধার কত-না করিত সন্তান আমার—

কত-না শোণিত দিত রে ঢালি॥

প্র: ১৮৭৮ (1878)

#3 শোনো শোনো আমাদের ব্যথা

শোনো শোনো আমাদের ব্যথা দেবদেব, প্রভু, দয়াময়—
 আমাদের ঝরিছে নয়ন, আমাদের ফাটিছে হৃদয়॥
 চিরদিন আঁধার না রয় রবি উঠে, নিশি দূর হয়—
 এ দেশের মাথার উপরে এ নিশীথ হবে না কি ক্ষয়।
 চিরদিন ঝরিবে নয়ন? চিরদিন ফাটিবে হৃদয়?।
 মরমে লুকানো কত দুখ, ঢাকিয়া রয়েছে ম্লান মুখ—
 কাঁদিবার নাই অবসর— কথা নাই, শুধু ফাটে বুক।
 সঙ্ক্ষেপে শ্রিয়মাণ প্রাণ, দশ দিশি বিভীষিকাময়—
 হেন হীন দীনহীন দেশে বুঝি তব হবে না আলয়।
চিরদিন ঝরিবে নয়ন? চিরদিন ফাটিবে হৃদয়?।
 কোনো কালে তুলিব কি মাথা। জাগিবে কি অচেতন প্রাণ।
 ভারতের প্রভাতগগনে উঠিবে কি তব জয়গান।
 আশ্বাসবচন কোনো ঠাই কোনোদিন শুনিতে না পাই—
 শুনিতে তোমার বাণী তাই মোরা সবে রয়েছে চাহিয়া।
 বলো, প্রভু, মুছিবে এ অঁঅখি, চিরদিন ফাটিবে না হিয়া॥

প্র: ফাল্গুন ১২৯১ (1885)

#4 **একি অন্ধকার এ**

একি অন্ধকার এ ভারতভূমি!

বুঝি, পিতা, তারে ছেড়ে গেছ তুমি।

প্রতি পলে পলে ডুবে রসাতলে কে তারে উদ্ধার করিবে॥—

চারি দিকে চাই, নাহি হেরি গতি। নাহি যে আশ্রয়, অসহায় অতি।

আজি এ আঁধারে বিপদপাথারে কাহার চরণ ধরিবে।

তুমি চাও পিতা, ঘুচাও এ দুখ। অভাগা দেশেরে হোয়ো না

বিমুখ—

নহিলে আঁধারে বিপদপাথারে কাহার চরণ ধরিবে।

দেখো চেয়ে তব সহস্র সন্তান লাজে নতশির, ভয়ে কম্পমান,

কাঁদিছে সহিছে শত অপমান লাজ মান আর থাকে না।—

হীনতা লয়েছে মাথায় তুলিয়া, তোমারেও তাই গিয়েছে ভুলিয়া,

দয়াময় ব'লে আকুলহৃদয়ে তোমারেও তারা ডাকে না।

তুমি চাও পিতা, তুমি চাও চাও। এ হীনতা-পাপ এ দুখ ঘুচাও।

ললাটের কলঙ্ক মুছাও মুছাও নহিলে এ দেশ থাকে না।—

তুমি যবে ছিলে পুণ্যভবনে কী সৌরভসুধা বহিত পবনে,

কী আনন্দগান উঠিত গগনে, কী প্রতিভাজ্যোতি জ্বলিত।

ভারত-অরণ্যে ঋষিদের গান অনন্তসদনে করিত প্রয়াণ—

তোমারে চাহিয়া পুণ্যপথ দিয়া সকলে মিলিয়া চলিত।

আজ কী হয়েছে! চাও পিতা, চাও। এ তাপ এ পাপ এ দুখ ঘুচাও।

মোরা তো রয়েছি তোমারি সন্তান

যদিও হয়েছি পতিত॥

প্র: ফাল্গুন ১২৯১ (1885)

#5 ঢাকো রে মুখ

ঢাকো রে মুখ, চন্দা, জলদে।

বিহগেরা থামো থামো। আঁধারে কাঁদো গো তুমি ধরা।

গাবে যদি গাও রে সবে গাও রে শত অশনি-মহানিনাদে—

ভীষণ প্রলয়সঙ্গীতে জাগাও জাগাও, জাগাও রে এ ভারতে॥

বনবিহঙ্গ, তুমি ও সুখগীতি গেয়ো না। প্রমোদমদিরা ঢালি প্রাণে প্রাণে

আনন্দরাগিণী আজি কেন বাজিছে এত হরষে—

ছিঁড়ে ফেল বীণা আজি বিষাদের দিনে॥

প্র: ১৮৭৮ (1878)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

4 লাইনে প্রলয়সঙ্গীতে ⇒ প্রলয়সংগীতে

#6 দেশে দেশে ভ্রমি তব

দেশে দেশে ভ্রমি তব দুখগান গাহিয়ে
 নগরে প্রান্তরে বনে বনে। অশ্রু ঝরে দু নয়নে,
 পাষাণ হৃদয় কাঁদে সে কাহিনী শুনিয়ে।
 জ্বলিয়া উঠে অযুত প্রাণ, এক সাথে মিলি এক গান গায়—
 নয়নে অনল ভায় শূন্য কাঁপে অভভেদী বজ্রনির্ঘোষে!—
 ভয়ে সবে নীরবে চাহিয়ে॥

ভাই বন্ধু তোমা বিনা আর মোর কেহ নাই।
 তুমি পিতা, তুমি মাতা, তুমি মোর সকলই।
 তোমারি দুঃখে কাঁদিব মাতা, তোমারি দুঃখে কাঁদাব।
 তোমারি তরে রেখেছি প্রাণ, তোমারি তরে ত্যজিব।
 সকল দুঃখ সহিব সুখে
 তোমারি মুখ চাহিয়ে॥

প্র: চৈত্র ১২৮৮ (1882)

#7 এক সূত্রে বাঁধিয়াছি

এক সূত্রে বাঁধিয়াছি সহস্রটি মন,
এক কার্যে সঁপিয়াছি সহস্র জীবন—
বন্দে মাতরম॥

আসুক সহস্র বাধা, বাধুক প্রলয়,
আমরা সহস্র প্রাণ রহিব নির্ভয়—
বন্দে মাতরম॥

আমরা ডরাইব না ঝটিকা-ঝঞ্ঝায়,
অযুত তরঙ্গ বক্ষে সহিব-হেলায়।
টুটে তো টুটুক এই নশ্বর জীবন,
তবু না ছিঁড়িবে কভু এ দৃঢ় বন্ধন—
বন্দে মাতরম॥

প্র: : ১৮৭৯ (1879)

#8 তোমারি তরে, মা

তোমারি তরে, মা, সঁপিছু এ দেহ। তোমারি তরে, মা, সঁপিছু প্রাণ॥
 তোমারি শোকে এ আঁখি বরষিবে, এ বীণা তোমারি গাহিবে গান॥
 যদিও এ বাহু অক্ষম দুর্বল তোমারি কার্য সাধিবে।
 যদিও এ অসি কলঙ্কে মলিন তোমারি পাশ নাশিবে॥
 যদিও, হে দেবী, শোণিতে আমার কিছুই তোমার হবে না
 তবু, ওগো মাতা পারি তা ঢালিতে একতিল তব কলঙ্ক ক্ষালিতে—
 নিভাতে তোমার যাতনা।

যদিও, জননী, যদিও আমার এ বীণায় কিছু নাহিক বল
 কী জানি যদি, মা, একটি সন্তান জাগি উঠে শুনি এ বীণাতান॥

প্র: আশ্বিন ১২৮৪ (1877)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

1 লাইনে তোমারি-তরে, মা, ... ⇒ তোমারি তরে মা, ...

5 লাইনে যদিও, হে-দেবী, ⇒ যদিও হে দেবী,

8 লাইনে যদিও, জননী, ⇒ যদিও জননী,

oeSP লাইনে কী-জানি-যদি, মা, ⇒ কী জানি যদি মা,

#9 **তবু পারি নে সাঁপিতে**

তবু পারি নে সাঁপিতে প্রাণ।

পলে পলে মরি সেও ভালো, সহি পদে পদে অপমান॥

কথার বাঁধুনি, কাঁদুনির পালা চোখে নাহি কারো নীর॥—

আবেদন আর নিবেদনের থালা ব'হে ব'হে নত শির।

কাঁদিয়ে সোহাগ, ছি ছি একি লাজ! জগতের মাঝে ভিখারির সাজ—

আপনি করি নে আপনার কাজ, পরের 'পরে অভিমান॥

আপনি নামাও কলঙ্কপশরা, যেয়ো না পরের দ্বার—

পরের পায়ে ধ'রে মান ভিক্ষা করা সকল ভিক্ষার ছার।

'দাও দাও' ব'লে পরের পিছু পিছু কাঁদিয়া বেড়ালে মেলে না তো কিছু

—

মান পেতে চাও, প্রাণ পেতে চাও, প্রাণ আগে করো দান॥

প্র: বৈশাখ ১২৯৪ (1887)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

5 লাইনে ভিখারির ⇒ ভিখারীর

#10 কেন চেয়ে আছ গো মা

কেন চেয়ে আছ গো মা, মুখপানে।

এরা চাহে না তোমারে চাহে না যে, আপন মায়েরে নাহি জানে।

এরা তোমায় কিছু দেবে না, দেবে না মিথ্যা কহে শুধু কত কী ভাণে॥

—

তুমি তো দিতেছ, মা, যা আছে তোমারি স্বর্ণশস্য তব, জাহবীবাবি,—

জ্ঞান ধর্ম কত পুণ্যকাহিনী।

এরা কী দেবে তোরে! কিছু না, কিছু না। মিথ্যা কবে শুধু হীনপরানে॥

মনের বেদনা রাখো, মা, মনে। নয়নবারি নিবারো নয়নে॥

মুখ লুকাও, মা, ধুলিশয়নে ভুলে থাকো যত হীন সন্তানে।—

শুন্য-পানে চেয়ে প্রহর গণি গণি দেখো কাটে কিনা দীর্ঘ রজনী।

দুঃখ জানায়ে কী হবে, জননী, নির্মম চেতনাহীন পাষাণে॥

প্র: ১২৯৩ (1886)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

3 লাইনে ভাণে ⇒ **ভানে**

4 লাইনে দিতেছ, মা, ⇒ **দিতেছ মা,**

7,8,10 লাইনে রাখো, মা,', 'লুকাও, মা,', 'হবে, জননী, ⇒ **রাখো মা,',**

'লুকাও মা,', 'হবে জননী,

#11 একবার তোরা মা বলিয়া ডাক

একবার তোরা মা বলিয়া ডাক, জগতজনের শ্রবণ জুড়াক,
 হিমাদ্রিপাষণ কেঁদে গলে যাক মুখ তুলে আজি চাহো রে॥—
 দাঁড়াও দেখি তোরা আত্মপর ভুলি, হৃদয়ে হৃদয়ে ছুটুক বিজুলি—
 প্রভাতগগনে কোটি শির তুলি নির্ভয়ে আজি গাহো রে॥
 বিশ কোটি কণ্ঠে মা বলে ডাকিলে রোমাঞ্চ উঠিবে অনন্ত
 নিখিলে,
 বিশ কোটি ছেলে মায়েরে ঘেরিলে দশ দিক সুখে হাসিবে।
 সেদিন প্রভাতে নূতন তপন নূতন জীবন করিবে বপন
 এ নহে কাহিনী, এ নহে স্বপন আসিবে সে দিন আসিবে॥—
 আপনার মায়ে মা ব'লে ডাকিলে, আপনার ভায়ে হৃদয়ে
 রাখিলে,
 সব পাপ তাপ দূরে যায় চলে পুণ্য প্রেমের বাতাসে।
 সেথায় বিরাজে দেব-আশীর্বাদ না থাকে কলহ, না থাকে
 বিষাদ—
 ঘুচে অপমান, জেগে ওঠে প্রাণ বিমল প্রতিভা বিকাশে॥—

প্র: ফাল্গুন-চৈত্র ১২৯২ (1886)

#12 **কে এসে যায় ফিরে**

কে এসে যায় ফিরে ফিরে আকুল নয়ননীরে।

কে বৃথা আশাভরে চাহিছে মুখ'পরে।

সে যে আমার জননী রে॥

কাহার সুধাময়ী বাণী মিলায় অনাদর মানি।

কাহার ভাষা হায় ভুলিতে সবে চায়।

সে যে আমার জননী রে॥

ক্ষণেক স্নেহ-কোল ছাড়ি চিনিতে আর নাই পারি।

আপন সন্তান করিছে অপমান—

সে যে আমার জননী রে॥

পূণ্য কুটিরে বিষণ্ণ কে বসি সাজাইয়া অন্ন।

সে স্নেহ-উপহার রুচে না মুখে আর।

সে যে আমার জননী রে॥

প্র: বৈশাখ ১৩০৫ (1898)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

1 লাইনে নয়ননীরে ⇒ **নয়নের নীরে**

10 লাইনে পূণ্য-কুটিরে ⇒ **বিরল কুটিরে**

#13 **হে ভারত, আজি তোমারি**

হে ভারত, আজি তোমারি সভায় শুন এ কবির গান।
 তোমার চরণে নবীন হরষে এনেছি পূজার দান।
 এনেছি মোদের দেহের শক্তি, এনেছি মোদের মনের ভক্তি,
 এনেছি মোদের ধর্মের মতি, এনেছি মোদের প্রাণ—
 এনেছি মোদের শ্রেষ্ঠ অর্ঘ্য তোমারে করিতে দান॥
 কাঞ্চনখালি নাই আমাদের, অন্ন নাইকো জুটে।
 যা আছে মোদের এনেছি সাজায়ে নবীন পর্ণপুটে।
 সমারোহে আজ নাই প্রয়োজন দীনের এ পূজা, দীন আয়োজন—
 চিরদারিদ্র্য করিব মোচন চরণের ধুলা লুটে।
 সুরদুর্লভ তোমার প্রসাদ লইব পর্ণপুটে॥
 রাজা তুমি নহ, হে মহাতাপস, তুমিই প্রাণের প্রিয়।
 ভিক্ষাভূষণ ফেলিয়া পরিব তোমারি উত্তরীয়।
 দৈন্যের মাঝে আছে তব ধন, মৌনের মাজেখ রয়েছে গোপন
 তোমার মন্ত্র অগ্নিচন তাই আমাদের দিয়ো।—

পরের সজ্জা ফেলিয়া পরিব তোমারি উত্তরীয়।
 দাও আমাদের অভয়মন্ত্র, অশোকমন্ত্র তব।
 দাও আমাদের অমৃতমন্ত্র, দাও গো জীবন নব।
 যে জীবন ছিল তব তপোবনে, যে জীবন ছিল তব রাজাসনে,
 মুক্ত দীপ্ত সে মহাজীবনে চিত্ত ভরিয়া লব।
 মৃত্যুতরণ শঙ্কাহরণ দাও সে মন্ত্র তব॥

প্র: বৈশাখ ১৩০৯ (1902)

দ্র: দ্র: গীতবিতান (১৯৭৩) আর রচনাবলী (১৯৮৭) তে তফাত:

1 লাইনে তোমারি-সভায় $\Rightarrow$ **নবীন বর্ষে**

2 লাইনে হরষে $\Rightarrow$ **হর্ষে**

#14 নব ব সরে করিলাম পণ

নব ব সরে করিলাম পণ লব স্বদেশের দীক্ষা—
 তব আশ্রমে তোমার চরণে, হে ভারত, লব শিক্ষা।
 পরের ভূষণ, পরের বসন, তেয়াগিব আজ পরের অশন—
 যদি হই দীন না হইব হীন, ছাড়িব পরের ভিক্ষা।
 নব ব সরে করিলাম পণ লব স্বদেশের দীক্ষা
 না থাকে প্রাসাদ আছে তো কুটির কল্যাণে সুপবিত্র।
 না থাকে নগর আছে তব বন ফলে ফুলে সুবিচিত্র।
 তোমা হতে যত দূরে গেছি স'রে তোমারে দেখেছি তত ছোটো ক'রে।
 কাছে দেখি আজ, হে হৃদয়রাজ, তুমি পুরাতন মিত্র।
 হে তাপস, তব পর্ণকুটির কল্যাণে সুপবিত্র।
 পরের বাক্যে তব পর হয়ে দিয়েছি পেয়েছি লজ্জা।
 তোমাদের ভুলিতে ফিরায়েছি মুখ, পরেছি পরের সজ্জা।
 কিছু নাই গণি' কিছু নাই কহি' জপিছ মন্ত্র অন্তরে রহি—
 তব সনাতন ধ্যানের আসন মোদের অস্থিমজ্জা।
 পরের বুলিতে তোমারে ভুলিতে দিয়েছি পেয়েছি লজ্জা॥
 সে-সকল লাজ তেয়াগিব আজ, লইব তোমার দীক্ষা।
 তব পদতলে বসিয়া বিরলে শিখিব তোমার শিক্ষা।
 তোমার ধর্ম, তোমার কর্ম, তব মন্ত্রের গভীর মর্ম
 লইব তুলিয়া সকল ভুলিয়া ছাড়িয়া পরের ভিক্ষা।
 তব গৌরবে গরব মানিব, লইব তোমার দীক্ষা॥

প্র: বৈশাখ ১৩০৯ (1902)

#15 **ওরে ভাই, মিথ্যা ভেবো না**

ওরে ভাই, মিথ্যা ভেবো না।

হবার নয় যা কোনোমতেই হবেই না সে, হতে দেব না॥

পড়ব না রে ধুলায় লুটে, যাবে না রে বাঁধন টুটে যেতে দেব না।—

মাথা যাতে নত হবে এমন বোঝা মাথায় নেব না॥

দুঃখ আছে, দুঃখ পেতেই হবে—

যত দূরে যাবার আছে সে তো যেতেই হবে।

উপর-পানে চেয়ে ওরে ব্যথা নে রে বক্ষে ধ'রে নে রে সকলে।—

নিঃসহায়ের সহায় যিনি বাজবে তাঁরে তোদের বেদনা॥

প্র: ২৫ আশ্বিন ১৩১২ (1905)

#16 আজ সবাই জুটে আসুক

আজ সবাই জুটে আসুক ছুটে যে যেখানে থাকে—
এবার যার খুশি সে বাঁধন কাটুক, আমরা বাঁধব
মাকে।

আমরা পরান দিয়ে আপন করে বাঁধব তাঁরে
সত্যডোরে,

সন্তানেরই বাহুপাশে বাঁধব লক্ষ পাকে।

আজ ধনী গরিব সবাই সমান। আয় রে হিন্দু , আয়
মুসলমান—

আজকে সকল কাজ পড়ে থাক, আয় রে লাখে লাখে।

আজ দাও গো সবার দুয়ার খুলে, যাও গো সকল
ভাবনা ভুলে—

সকল ডাকের উপরে আজ মা আমাদের ডাকে॥

প্র: ২৪ আশ্বিন ১৩১২ (1905)
